

Crap sin crap, senza maulta

40 emprendists dil concern Implemia reconstrueschan il «mir chines» dall'Alp Nagens sur Laax

■ (anr/abc) Ier ha la fundaziun Pro Laax envidau las medias da visitar in plazzal da baghegiar. Quel ei buca zannua el vitg da Laax, era buc exnum ella vischinonza da quel. Il plazzal ei sin 2128 m s. m. sill'Alp Nagens. L'Alp Nagens sur Laax ei in territori cultivau vegliander. Gia el testament digl uestg Tello, il pli vegl document dil Grischun, eis ella menziunada sco alp «Agise». Gia dapi varga 1250 onns pasculescha la biestga en quei territori. Da cheu anora meinan sendas en tuttas direzioni. Ina meina encunter il Plaun Segnes Sut, da leu van ins encunter il Pass dil Segnes e sa cuntinuar giuaden Glaruna. Cheu haveva la secziun Pèz Terri baghegiu sia emprema camona pils alpinists. Da macort'aura ha ei en quei territori savens tschaghera e spessa brentina. Fertg prigulus per la biestga che pasculescha. L'Alp Nagens schai el territori nua che la Bova da Flem ei rutta ora avon rodund 10'000 onns. Las pastiras da Laax ein bialas e migei-

vlas, encunter nordost cunfineschan ellas culla spuretga e prigulusa Plat'Alva da Flem. Igl ei il scarp dalla bova prehistorica.

Pli baul construiv cun stentas

Igl onn 1870 han ils da Laax entschiet a baghegiar in mir da schurmetg en quei liug. Per che las vaccas crodien buca dalla greppa giu. Igl ei in mir da rodund 1200 meters lunghesia, el entscheiva sin 2096 m s. m. e sestenda encunter nord tochen sil sumfil sin 2250 m s. m. Oz ei il mir danvon, pertgei novas metodos da pertgirar cun seivs electricas garantechan la segirtad dalla muaglia. Il liug mir impressiunont han ils da Laax denton buca viliu schar ir en decadenza. Igl ei ina perdetga d'in temps ch'ins fageva bia sacrificez, ch'ins cultivava cun stenta e fadigia il funs e pertgirava il muvel. Oz levgeschan novas metodos quella lavur a maun.



Ils emprendists d'Implemia culs accompignaders. Davostier vesta viers il Crap da Flem ed il Plaun.

FOTOS A. BEELI



Il president dalla Pro Laax, Erwin Ardüser (davontier), ei satisfatg ed engrazieivels dil sustegn.

Quest'jamna san 40 emprendists dall'interpresa Implemia emperder d'encuscher quella lavur a maun da pli baul. Lur firma ha tarmess els per in'jamna si dalla Bassa ellas muntognas per separticipar ad in'jamna da project. *Valérie Frede* ch'ei menadra dils ressort dils emprendists tier Implemia ei menadra dil camp. Implemia ha sia sedia a Dietlikon ed occupescha rodund 10'000 personas ell'entira Europa. Igl onn 2017 ha ella fatg ina sviulta da 3,9 milliardas francs.

Ils emprendists da tuttas parts dalla Svizra ch'ei quest'jamna sill'Alp Nagens lavuran buca per quella sviulta. Els prestan lavur gratuita ed emperdan d'encon-

schier la tecnica da construir mirs senza maulta. Frede habitescha a Laax ed ei colliada da pintga ensi cun quella vischnaunca. Grazia ad ella ha la fundaziun Pro Laax ha saviu organisar la renovaziun dil mir schetg da Nagens. Avon dus onns haveva ina inspeziun al liug mussau ch'igl ei in project fetg voluminus. Grazia als emprendists dad Implemia selai quel ussa realisar. A caschun dalla viseta dad ier han ins saviu seperschader co ils juvenils lavuran. Il specialist da mirs schetgs e menader tecnic dil project, *Matthias Götsch*, ei fetg cuntents culla prestaziun. «Bein, ils biars ein iniziativs ed interessai», ha el sincerau sin damonda dall'anr. Götsch ei

staus participaus vid la reconstrucziun dil mir schetg Cleus a Schluëin. Margis sera ha *Simone Jakob Federspiel*, collaboratura digl Uffeci cantunal per natira ed ambient, visitau ils juvenils. Ella ha presentau l'impurtonza dils mirs schetgs e rendiu attent che la crappa cavigliada ina sin l'autra senza maulta ein loghens da sezuppar per reptils ed auters animals. Mo cun forza dalla bratscha e dils mauns han era ils emprendists dad Implemia stuiu cavigliar in crap sin tschel. Per part fuva il mir daus ensem dilut, per part fuva el intact. Sco quei che Frede ha confirmau han ils emprendists dad Implemia saviu sanar in quart digl entir mir.

Msgr. Ivo Muser, uestg dils Ladins, a Mustér

Fatg vacanzas en claustra e celebrav a S. Gions

■ (anr/gc) El Fegl parochial dall'jamna vargada steva ei sut Mustér: «Oz, (dumengia vargada) astgein nus beneventar sco celebrant principal uestg Ivo Muser dalla diocesa da Bozen (Bulsau) cun far ad el in cordial beinvegni». El era sepurschius persunter e nus essan stai buca pauc surstai ch'uestg Muser ha salidau all'entschatta dil survetsch divin en perfetg romontsch ed era entschiet tuttas oraziuns principalas en nies lungatg. Daco quei?

Dapi 2011 ei uestg *Ivo Muser* cau dalla gronda diocesa da Bulsau cun varga 500'000 catolics. Quella, che secatta el Tirol dil sid (Italia), ei trilingua: talian, ladin e tudestg (sco quella da Cuera). La denominaziun ladina ufficala per sia diocesa secloma era «Diozeja de Bulsan-Persenon» (Brixen). Tier sia diocesa s'audan era ca. 25'000 Ladins, principalmein ella Val Gardena ed ella Val Badia, che plaidan ladin dolomitan, in lungatg fetg datier dil romontsch. Perquei sa, plaida e drova uestg Muser era ladin.

Il Vnuost – antruras part dalla diocesa da Cuera

En sia introducziun ha uestg Muser era regardau al fatg che la diocesa da Cuera



Msgr. Ivo Muser, cau d'ina diocesa trilingua, pia: Der Bischof von Bozen-Brixen; Il vescovo di Bolzano-Bressanone; L vescul de Bulsan-Persenon.

MAD

e la sia da Bulsau cunfineschien ina cun l'autra. Il territori dalla diocesa da Bulsau, il Vnuost /Vintschgau – che secatta denter la Val Müstair el vest, il Pass Raisch el nord, Meran egl ost e Trafoi el sid ei staus tochen 1816 in decanat cun ca. 50 pleivs digl uestgju da Cuera. 1816 ei quei territori vegniun prius naven alla diocesa da Cuera ed integraus en quella da Brixen (Persenon). Dapi 1964 s'auda il territori dils biars Ladins ellas Dolomitas tier la diocesa da Bulsau-Persenon. La sedia episcopala ei vegnida translocada lu da Brixen a Bulsau nua ch'igl uestg Muser residiescha oz.

En la messa, concelebrada cun plirs confrars, ed el bi priedi ch'uestg Muser ha salvau ella baselgia da S. Gions a Mustér, eis el sebasaus sigl evangeli dil di cun l'incarica dil Segner d'annunziar la buna nova a tuts. Senza cristianissem fussi il mund pli vits, senza speranza e da pauc senn e tegn. El concluda cuagl appel a mintgin da procurar che la cardientscha vegni dada vinavon. En sia diocesa da Bulsau succeda quei era per ladin sco en quella da Cuera romontsch, dus lungatgs parentai, schegie geograficamein lunsch in ord l'auter. La celebraziun dil survetsch cun Ivo Muser ei stada edificonta.

Pli paucs scolasts al gimnasi a Mustér

■ (rtr) L'onn da scola 2018/19 instrueschan 35 scolasts e prefects al gimnasi. L'onn avant eran quai anc 40, ha confermà il rector Roman Walker. La raschun che quests scolasts bandunan Mustér è ch'i na dat pli il program internaziunal pre-UGKD (program preliminar per las universitads svizras). Il program internaziunal pre-UGKD aveva il gimnasi da la claustra da Mustér introduci 2016, anc avant il temp dal rector actual. Cun quel avessan scolars da l'exteriur pudì far la matura svizra, uschia ch'il gimnasi avess era gi quella dasper la matura grischuna. Mo la finala han ils scolars da l'exteriur mancà e perquai hajan ils manaders dal gimnasi decidì avant in onn da sistir quest program/questa scolaziun, di *Roman Walker*. Quai ha gi consequenzas per il tschintg scolasts ch'eran pladids per il pre-U. Quests scolasts (che vegnivan da la Bassa) avevan er anc in pensum en ils roms per la matura grischuna. Uss surpiglian ils auters scolasts (che stattan en la regiun) quests pensums. Quai munta ch'il gimnasi sto remplazzar mo dus scolasts. Els dus en gi pladixds: in scolast da matematica (che stat a Dardin) ed il dirigent *Peter Werlen* (successur da *Clau Scherrer*). Ina novitad positiva saja era che frater *Paul* haja terminà sia scolaziun e vegn enavos en claustra sco scolast da chemia (en tudestg ed englais). Il proxim onn da scola instrueschan sis paders e fra-

ters. Dentant cuntinua il gimnasi las stentas da tschertgar scolars d'auters chantuns e da l'exteriur. Els veglian carmalar scolars dal Tessin è da la Mesolcina a Mustér, di il rector. Perquai cursescha il 2019 in bus tranter Mustér e Roveredo. Scolaras e scolars vegnan la dumengia saira e van a chasa venderdi saira, sch'il Pass dal Lucmagn fiss serrà l'enviern pudess il bus charrar sur il San Bernardino. Era cun il chantun Uri ha il gimnasi da la claustra da Mustér fatg ina convegnada scola. Quella prevesa ch'il chantun Uri paja ils daners da scola (l'onn da scola passà en quai stads 24'000 francs) per scolars dad Andermatt, Hospental e Realp, ha il Departament d'educaziun da l'Uri confermà. En quest connex haja el era discurre cun l'investider *Samih Sawiris* che realisescha ad Andermatt ses resort da vacanzas. Sche personas cumpran là abitaziuns ed abiteschan en il chantun Uri pudessan ellas laschar vegnir lur uffants a scola a Mustér. Ma il gimnasi vul era tger enavant ils contacts cun il chantun Turig e conturn. Ed era las stentas per scolars da l'exteriur cuntinueschan. Per l'onn da scola 2019/20 quinta Walker che quatter fin ogt scolars da la China vegnian a Mustér. E per il proxim onn da scola hajan els ina giuvna ed in giuvan da la Namibia. En tut ha il gimnasi da la claustra da Mustér il mument da quai da 160 scolaras e scolars.